



MALO O SAMOA

**SAUNOAGA O LE TALA
FAATATAU O LE TUPE
2015/2016**

AFIOGA TUILAEPA LUPESOLIAI FATIALOFA SAILELE MALIELEGAOI

PALEMIA & MINISITA O TUPE

26 ME 2015

SAUNOAGA O LE TALA FAATATAU AUTU O LE TUPE 2015/16

“Fua le mana’o i seleni ua maua”

Lau Afioga i le Fofoga Fetalai,

E tusa ai ma le Tulafono Tumau 124, e ia te a’u le ava ma le faaaloalo, e avea ai a’u e fai ma Sui o le Malo, ou te tuuina atu se oototoga o le Tala Faatatau Autu o le Tupe mo le tausaga faale-tupe 2015/16 i luma o le laulauafono a le Palemene.

I. FAAVAE O LE TALA AUTU O LE TUPE

Lau Afioga i le Fofoga Fetalai ma Sui Mamalu o le Palemene,

O lenei tala o le tupe o lo’o faavae i se faasoia ua ‘uti’uti ma lē lava. Talu mai tulaga ogaoga sa feagai ma lo tatou tamaoiga e pei o le faaletonu o le tamaoiga o le lalolagi i le 2008, galulolo i le 2009 ma le afā o Evani i le 2012, sa maitauina ai le siita’i o tupe faaalu a le Malo e tali atu ai i ia faaletonu. Sa maitauina fo’i o nei tupe faaalu, sa tele se sao o atunuu mai fafo i lona faatupeina. Peita’i o le tausaga 2015/16, o le a matuā tuutiitia tupe faaalu ona o lea ua tele ina maea galuega lavea’i ma galuega tau atia’e sa feagai ma le Malo.

Lau Afioga i le Fofoga Fetalai ma Sui Mamalu o le Palemene

O le upu moni e le gafatia e le Malo le faaauau pea o ia tupe faaalu maualuluga e pei ona i ai i le 5 tausaga ua tuana’i e aunoa ma le fesoasoani a a tatou paaga poo le siitia o a tatou tiute ma lafoga. E ao foi ina tatou faasoasoa tatau tupe faaalu ina ia ausia le tapulaa o le faasiliga o tupe faaalu nai lo tupe maua i le 3.5% o le tuuaofaiga o le tamaoiga.

Ina ia ausia lea tulaga, o lea ua manatu ai le Malo ina ia tuutiitia tupe faaalu i le tausaga fou. Ma ou te fiafia e faailoa atu ua mafai ona faatino lea tulaga e aunoa ma le oia o le auaunaga mo le mamalu o le atunuu. O le feau taua ina ia fua le mana’o i seleni ua maua.

II. TAIALA O LE TALA O LE TUPE

E i ai le manatu o le a siitia le tamaoiga i le 1.9% i le tausaga 2015/16 ma o le a ausia foi le tuuaofaiga e \$2.0 piliona tala.

O le tau faai’ui’u ai o galuega toe faaleleia talu mai le afa o Evani ma le mae’a ai o le fono tele a atunuu laiti o le lalolagi lea sa usuia i Samoa nei i le tausaga ua tuana’i, o le a avea lea ma faavae e tuutiitia ai tupe faaalu i le 2015/16 fua i le 2014/15. O le faasiliga o tupe faaalu nai lo tupe maua o le a faamauiina lea i le 4.7% o le tamaoiga. E maualuga atu nai lo le tapulaa e 4.2% na fuafua mo le 2014/15, peita’i o se alafua iloga pe a fua i le tulaga pa’ū maualalo o tupe maua.

I le vaega o tupe maua, e leai se faamoemoe e siitia tiute ma lafoga. Peita’i e i ai le faamoemoe e faatino nai suiga laiti i le lafoga mo fagu inu suamalie, ava malosia faapea sikaleti ina ia unaia le

soifua maloloina, aemaise lava i le tupulaga laiti. O loo fuafua foi e faatino se lafoga e lagolagosua ai i le atina'e o malosiaga faafouina (renewable energy source). O lea fuafuaga o le a vave ai ona ausia le faaititia o le tau o le eletise i le mamalu o le atunuu faapea foi ona ausia le manulauti ina ia 100% le eletise e maua mai le malosi faafouina i le tausaga 2017.

O le a pa'u maualalo tupe faameaalofa mai a tatou paaga i le tausaga fou. Ua mafua lea tulaga ona o le toe fetuunaiga o le tulaga o loo i ai a tatou nonogatupe lea ua see mai i le high to medium debt distress. O lona uiga o le a lē toe agavaa Samoa i le 100% o tupe faameaalofa ae see atu i le 50% tupe faameaalofa 50% tupe nono. O le a fesoasoani foi le mae'a ai o galuega toe faaleleia ona o le afa o Evani i le pa'u maualalo o tupe faameaalofa i le tausaga fou.

E leai se faamoemoe e toe faatino nisi nonogatupe sei vagana ua ausia aiaiga o le Taiala mo Nogatupe pe iloga sona sao i le atina'e o le tamaoaiga.

III. ATINA'E AUSIA I LE LIMA TAUSAGA UA MAVAE

Lau Afioga i le Fofoga Fetalai ma sui mamalu o le Palemene,

E ia te a'u le ava ma le faaaloalo, oute tuuina atu ai se oototoga o faamatalaga i nisi o atina'e sa ausia i le lima tausaga talu ai o lenei nofoaiga faapalemene.

Na a'afia le tamaoaiga o le atunuu i le lima tausaga ua mavae e mafua mai i faalavelave faalenatura faapea ai ma le faaletonu o le tamaoaiga o le lalolagi (global financial crisis). Sa tali atu le malo i nei aafiaga e ala lea i le siitai o tau tupe faaalu aua le fa'atinoina o galuega toe fa'aleleia ma faataoto polokalame e una'ia ai atina'e mo le tamaoaiga o le atunuu talu mai le faaletonu o le tamaoaiga o le lalolagi.

E ui i le tulaga ma'ale'ale sa iai, na iloga ona siitia le tamaoaiga i le 5.6% i le tausaga faaletupe 2010/11. Na faatupulaia le tamaoaiga i le 0.4% i le 2011/12 ae pa'u maualalo i le 2% i le 2012/13 ona o aafiaga o le afa o Evani ia Tesema 2012 lea na faaleagaina ai le tele o vaega o le atunuu. Ae peita'i, na toe siitia le tamaoaiga i le 2013/14 i le 1.2% ona o galuega toe faaleleia o le Afa o Evani. O loo faamoemoe o le a siitia le tamaoaiga i le 2.3% i le tausaga faaletupe 2014/15 talu ai ona o le taligamalo i le Fonotaga mo Atunuu Laiti Tauatiae o le lalolagi ma le fausiaina o faletalimalo tetele e pei o le Lamana Hotel, Aggie Greys Beach Resort, Aggie Greys Hotel, Aga Reef Resort ma le Return to Paradise Resort.

I le itu tau i aoaoga, e tele fesoasoani i lenei vaega ona o se tasi o vaega o lo'o ave iai le faamuamua a le Malo e tauala atu i le Taiala mo le Atina'e o Samoa (SDS). Sa sami aloa'ia le Fuafuaga Faataatitia mo Vaega Maoti o Aoaoga 2013 - 2018 e limata'ita'iina ai galuega faamuamua mo le atina'e o aoga. Sa faapea fo'i ona fesoasoani le malo i le Polokalame mo le totogiina o Pili Aoga o tamaiti aoga Tulaga Lua faapea ma Kolisi.

Ua faapea foi ona tuuina atu i lalo o le faamalumaluga a le Univesite Aoao o Samoa le Iunivesite Faafomai (Oceania University of Medicine) ma o fa'amanuiaga uma e ono maua mai ai o le a pa'u tonu i tamaiti aoga o le atunuu e aunoa ma le toe ai'aina mai fafo.

O le ma'ea ai o le Maota Gasegase i Motootua e atagia ai le faamuamua a le Malo i le atina'e o le soifua maloloina. O lenei falema'i ua faatotogaina i masini faaonapo neie faatino ai togafitiga ma auaunaga mo tagata lautele. Ua ma'ea fo'i ona toe faaleleia falema'i faaitumalo i Poutasi, Lalomanu, Safotu, Foailalo ma Sataua ina ia maua pea e le mamalu lautele togafitiga i nuu i tua auaunaga uma tau i le Soifua Maloloina.

I le vaega o faatoaga, ua mae'a ona faalauiloa aloaia le Fuafuaga Faataatia mo le Vaega Maoti o Faatoaga e limataitaiina ai galuega faamuamua. Sa faamuamua le toe lalagaina o le vaega o faatoaga e ala i le polokalame faatosina mo le toe totona o le koko, niu ma le kofe faapea le polokalame o le Talomua. O loo va'ava'alu lea galuega ma le polokalame mo le unaia o atina'e o Faatoaga(SACEP) e ala i le faaleleia o lafumanu ma faatoaga mo fualaaui faisua ma fualaaui aina. Ua amatalia foi se poloketi mo le unaia o Faatoaga Faapisinisi (Agribusiness). O lenei taumafaiga o le a agavaa ai pisinisi tau faatoaga i nonogatupe ma atina'e ai maketi i fafo mo le faataua atu o fua o faaeleelega. O lo'o faaauau pea foi suesuega a le Faalapotopotoga o Suesuega Faasaienisi a Samoa mo metotia e gaosia ai oloa mai fua o faaeleelega e pei o le avoka ma le ulu e fesoasoani ai i le au faapisinisi.

I le tulaga o ala tetele, ua tele ina siitia ma faaleleia le tulaga o auala i le atunuu atoa talu ai galuega toe faaleleia ona o le afa o Evani. Ua le toe mamao ae faamaea le auala fou mai Samusu i Lalomanu. O le a faapea foi ona toe faaauau le auala mai Vailoa e agai atu i Vaitele. O le auala mai Apia i Faleolo o le a toe faaleleia ina ia 'alofia le aafiaga ona o suiga o le tau. Ua maea fausia fo'i e le Pulega o Femalagaiga i luga o le Laueleele fuafuaga mo le siitia o tulaga o auala i totonu o le taulaga faapea ma afioaga i tua.

O lo'o ave pea le faamamafa i le atina'eina o malosiaga faafouina ina ia vave ausia le eletise i se tau maualalo ma gafatia e o tatou tagata. Ua mafai nei ona gaosia le eletise mai malosiaga faafouina e pei o le malosi o le la faapea le savili. O lo'o mata'ituina lelei le fale eletise i Fiaga i ina ia mautinoa le maua pea e tagata nuu le auaunaga tau eletise i soo se taimi.

O loo faaauau pea le fesoasoani a le Iuni a Europa i le faatupeina o atina'e o le Suavai ina ia siitia pea le auaunaga mo le atunuu lautele.

I le itu tau i fesoota'iga, ua ma'ea nei le atina'e mo le Faalauteleina o Fesootaiga Faatekonolosi (National Broadband Highway Network). O lenei atina'e taua o le'ā fesoasoani malosi i le siitia o le saosaoa i fesootaiga tau tekonolosi. E mafai foi ona fesoasoani i auaunaga faa-Soifua maloloina faapea ma a'oa'oga ina ia faigofie fesootaiga ma nu'u ma afio'aga i tua.

O le vaega o Turisi o se tasi lea o atina'e taua o loo ave pea iai le faamuamua ma le lagolago a le malo. O le fesoasoani a le malo ua mafai ai ona fausia fale talimalo tetele e pei o le Sheraton Aggie Grey's Beach Resort, Return to Paradise Resort i Lefaga, Aga Reef Resort i Lalomanu faapea le Orator Hotel i Tanumapua. O isi fale talimalo e pei o le Lamana Hotel i Taumeasina ma le Aggie Grey's Hotel i Vaisigano o lo'o fuafua e mae'a le fausiaina i le amataga o le tausaga fou.

I le tausaga ua tuana’i, sa talimalo ai Samoa i le fonotaga muamua aupito i telē i totonu o le Pasefika mo atunu’u laiti tauatia’e o le lalolagi. O se avanoa lelei lea e saga faalauiloa ai Samoa i le lalolagi ma fa’atupula’ia ai tagata tafafao mai faapea fefa’atauaiga.

IV. OTO’OTOGA O LE TALA O LE TUPE

Lau Afioga i le Fofoga Fetalai

O le oto’otoga lenei o le Tala Faatatau Autu o le Tupe mo le Tausaga Faaletupe 2015/16:

<u>Tupe Maua</u>		\$689,013,681
Tupe Maua Masani	\$551,916,733	
Tupe Faameaalofa mai Fafo	\$137,096,948	
<u>Tupe Fa’aalu</u>		\$785,357,784
Tupe Fa’aalu Faaletulafono	\$103,298,657	
Tupe Fa’aalu i Polokalame	\$478,223,687	
Tupe Fa’aalu i Atina’e	\$189,488,730	
Tupe Fa’aalu le Fuafuaina	\$ 14,346,711	
<u>Faasiliga o Tupe Alu i Tupe Maua</u>		(\$96,344,104)
Faatupeina mai:		
Nonogatupe e māmā tului	\$84,082,700	
<u>Tupe Pa’ū</u>		(\$12,261,404)

O le aotelega o le Tala o le Tupe ua faamoemoe e faamauina ai se faasiliga o tupe faaalu nai lo tupe maua e tusa lea ma le \$96.3 miliona tala poo le 4.7% o le tamaoaiga. O lenei faasiliga o le a faatupeina mai nonogatupe e maualalo o latou tului.

O lenei tulaga o lo’o atagia ai le naunauta’iga o le Malo ina ia ausia le 3.5% i se taimi lata mai.

V. FAVAE O TUPE MAUA

Lau Afioga i le Fofoga Fetalai,

O le a faaititia Tupe Maua masani ile 0.2% e mafua mai lea i faatosina e unaia ai le atina’e o faletalimalo, oloa gaosi faapea malosiaga faafouina. E pei ona ta’ua muamua e 23% o le a pa’ū ai tupe faameaalofa mai tatou paaga talu ai ona ua suia le faatulagaina o aitalafu a Samoa mai le “high debt distress” ile “medium debt distress” ma ua avea ma tulaga e lē toe agava’a ai Samoa ile 100% o tupe faameaalofa ae ua agava’a nei ile na’o le 50% tupe faameaalofa; 50% tupe nono.

Ina ia ausia taiala mo le soifua manuia faapea le tali atu i suiga o le tau, o lea ua manatu ai le Malo e faatino faiga faavae o loo taua i lalo mo le tausaga 2015/16:

1. Lafoga i fagu inu suamalie, ava malosi ma tapa'a

O le soifua maloloina o tagatanu'u Samoa o se luitau e ave iai le faamuamua a le Malo. O le tele o faama'i lē pipisi e aofia ai le tino puta, toto maualuga, ma'i suka ma nisi o lo'o faatupula'ia pea talu ai mea ai taumafa. Ua maitauina foi le faatupula'ia o vaegatupe faaalu a le Malo auā le togafitiga o nei gasegase. Ina ia faaitiitia nei tulaga, o lea o le a faatino ai le lafoga mo fagu inu suamalie ma le ava malosi e tusa ma le 6.5% faatasi ai ma le 5% o le lafoga i tapa'a.

2. Lafoga mo le atina'e o malosi'aga faafouina;

O aafiaga ona o suiga o le tau oni luitau o loo feagai ma atunuu taitasi o le lalolagi. O le faaaogaina o sua'u'u mo soo se atina'e ua mautinoa e tele se aafiaga o le siosiomaga ma e tele sona sao i le faatupula'ia o mala faalenatura e pei ona maitauina nei. Ua manatu nei la le Malo e unaia le atina'e o malosiaga faafouina ina ia tuuitiitia le faaleagaina o le siosiomaga ona o kasa oona.

Ina ia ausia lea tulaga, o le a faaopopo ai se lafoga e 6.5sene i le lita mo le atina'e o malosiaga faafouina. O lenei fuafuaga o le a vave ausia ai foi le ono faaitiitia o pili eletise mo le mamalu o le atunuu faapea le taunuu o le manulauti ina ia 100% le eletise e maua mai i malosi faafouina i le tausaga 2017.

VI. ATINA'E FAAMUAMUA

Lau Afioga i le Fofoga Fetalai ma sui mamalu o le Palemene

O le aofa'iga o tupe fa'aalu fuafuaina mo le 2015/16 e \$785.4m ma e tusa ma le 2.2% e pa'u ai pe a faatusa ile tausaga o lo'o faagasolo nei. O lo'o atagaia mai ai le naunauta'iga o le Malo ina ia faasoasoa tatau tupe faaalu e fua i tupe maua ina ia ausia alafua tau tupe talafeagai.

O le a ou auiliiliina atu atina'e o lo'o ave iai le fa'amuamua mo le tausaga faaletupe 2015/16:

1. Soifua Maloloina

E \$82.98 miliona tala ua faaagaga mo atina'e ma polokalame a le vaega o le Soifua Maloloina e tusa lea ma le 17% o le aotelega o tupe faaalu. O vaega nei ua ave iai le faamuamua:

- \$7.6miliona e faatino ai le tautua a le Matagaluega o Soifua Maloloina;
- \$5.6miliona e fesoasoani ai ile Faalapotopotoga mo Gasegase Faamama Toto;
- \$67.1miliona ua faaagaga mo le Auaunaga Faa-Soifua Maloloina;
- \$2.5miliona ua faaagaga nei mo gasegase e auina atu mo togafitiga i fafo.

2. A'oa'oga

E \$81.5 miliona tala ua fuafuaina nei mo atina'e o A'oa'oga e tusa lea ma le 16.6% o le aotelega o tupe faaalu a le Malo poo le 4% pe a fua i le tuuaofaiga o le tamaoaiaga. O vaega nei o le a ave i ai le faamuamua:

\$50.4miliona mo galuega ma auaunaga a le Matagaluega o Aoga;
\$6.0miliona ua faaagaga e faameaalofa atu mo Aoga a Ekalesia ma Aoga Tumaoti;
\$2.76miliona e fesoasoanai atu ai ile Pulega o Faailoga ma Tusi Pasi Tauaoloa o Samoa;
\$11.05miliona e faamatu'u atu mo le Iunivesite Aoao o Samoa;
\$1.5miliona e faatupeina ai api, peni ma meaaoga uma e faaaogaina e alo ma fanau aoga mo aoga uma a le Malo.

E le o aofia ai le \$5.7miliona i lalo o le Matagaluega o Tupe o lo'o fuafua nei mo le faatinoina o le Polokalame mo Pili Aoga e fesoasoani ai ile faaaogaina o le fanau ale atunu'u.

3. Atina'e Tetele

Eletise:

E \$11.3 miliona se vaega tupe o lo'o tuuina atu ile Malosi'aga tau Eletise mo latou auaunaga masani. Mai leni aofa'iga e \$7 miliona e totogi ai lafoga tau suauu a'o le paleni e \$4.3miliona ua faaagaga mo auaunaga mo nuu ma alalafaga i tua.

Suavai

E \$12 miliona o le a faamatu'u atu lea ile Pulega o le Suavai. Mai lea aofa'iga e \$4.22miliona o le a fesoasoani ai i auaunaga mo nu'u ma alalafaga i tua ma le \$7.78 miliona mai le Iuni o Europa (European Union) auā atina'e tetele mo le siitia o auanaga masani.

Auala Tetele ma Ala laupapa

O le aofa'iga o le fesoasoani a le Malo mo le Ofisa o Fela'ua'iga ile Laualeele e tusa ma le \$19.89miliona auā galuega faaleleia mo auala tetele ma ala laupapa. O leni vaegatupe e 16.7% e itiiti ai nai lo le tausaga o lo'o faagasolo nei ma e atagia mai ai le faamae'aina o le tele o galuega sa moomia talu ai aafiaga mai le Afa o Evani.

Feso'ota'iga Tau Tekonolosi

O le vaega nei mo feso'ota'iga tau tekonolosi o se tasi o vaega o lo'o ave iai le faamuamua a le Malo talu ai lona sao ile atina'e o pisinisi aemaise ai le atina'ega o le tamaoaiga atoa. Ina ia faamausaliina leni faamuamua, o atina'e nei o lo'o faasaga iai le fesoasoani a le Malo:

E \$4.23 miliona o e fesoasoani ai i galuega ma auaunaga a le Matagaluega o Feso'ota'iga;
\$1.75 miliona ua tuuina atu mo auaunaga a le Ofisa o le Pule Faatonu;
\$1.2 miliona le sao a le Malo e totogi ai auaunaga tau feso'ota'iga i luga o initaneti e faaoga ai pe'au lautele mo feso'ota'iga i Samoa (National Broadband Highway);
O lo'o iai fo'i se fesoasoani faameaalofa mai le Fale Tupe o Asia ma le Fale Tupe ale Lalolagi e tusa ma le \$7.4 miliona e faatupe ai se isi aupega mo feso'ota'iga o lo'o ile taele o le sami (Submarine Cable).

4. Faato'aga

O le aofa'i o tupe faalu fuafuaina mo le atina'e o faatoaga e tusa ma le \$13.6 miliona mo le tausaga 2015/16 aua vaega nei:

\$11.3 miliona o le a tuuina atu mo galuega ma auaunaga a le Matagaluega o Faatoaga;

\$0.5 miliona o le a faaagaga lea mo polokalame masani mo le faalauiloaina o fua o faaeleeleaga;

E le o aofia i totonu o lenei aofaiga le fesoasoani o lo'o tuuina mai le Fale Tupe o le Lalolagi e \$4.9m tala aua le Una'ia o Atina'e tau Faato'aga (SACEP) e aofia ai le atina'e o fualaaui'aina ma lafu manu papalagi ina ia tuutiitia le faalagolago i oloa faatauina mai fafo mo le fofoga taumafa. O lo'o iai fo'i ma se vaegatupe e \$3.7 miliona tala e fesoasoani ai ile toe faaleleia o faatoaga sa aafia tele ile Afa o Evani.

O lo'o fesoasoani mai fo'i le Fale Tupe o Asia i le Unaia o Pisinisi mo Faifaatoaga lea o lo'o tuuina mai ai le \$370,000 mo le tausaga faaletupe 2015/16.

5. Fefaatauaiga, Pisinisi ma Alamanuia

O le atina'e o Fefaataua'iga, Pisinisi ma oloa gaosi, o se tasi lea o vaega o lo'o ave iai le faamuamua aua e faamoemoe tele iai le atina'e o le tamaoaiga. O nisi nei o vaega o lo'o ave iai le faamuamau:

\$3.98 miliona o le a tuuina atu lea mo le faatinoina o auaunaga a le Matagaluega mo Pisinisi, Alamanuia ma Leipa;

\$9.32 miliona e fesoasoani ai i galuega faatino a le Ofisa mo Tagata Tafafao Maimoa mai Fafo;

\$450,000 o le a tu'u atu e fesoasoani ai i galuega a le Ofisa mo le Atina'e o Pisinisi Laiti (SBEC);

\$200,000 e tuuina atu lea mo le Vaega Tumaoti;

\$125,300 o le a fesoasoani ai ile faaauuina o le polokalame Aperitenisi o lo'o faatautaia i le Iunivesite Aoao o Samoa.

6. Taaloga mo Tupulaga Talavou o Malo o le Taupulega 2015

E \$5 miliona ua faaagaga nei aua le taligamalo mo taaloga a tupulaga talavou o Malo o le taupulega e pei ona fuafuaina mo le masina o Setema 2015. O lenei faamoemoe e tusa ma le 1,500 tagata o le a malaga mai ai mai atunuu e 69 o le taupulega.

VII. VAEGATUPE LĒ FUAFUAINA

E \$14.35 miliona se vaegatupe o lo'o faaagaga nei mo ni faamoemoe le fuafuaina e ono tula'i mai i totonu o le tausaga faaletupe 2015/16.

VIII. TALA FAAOPOPO LONA LUA O LE TUPE 2014/2015

Ua tuuina atu faatasi ma le Tala Faatatau Faaopopo Lona Lua o le Tupe 2014/15. O lenei Tala Faatatau Faaopopo Lona Lua o le Tupe e lēai sona tau faaopopo ma o le a faatupe lava i le fetuunaiga o seleni o loo i ai nei.

IX. UPU FAAIU

Lau afioga i le Fofoga Fetalai ma le mamalu o le maota,

O lenei tala o le tupe o lo’o faavae i le sini autu “Fua le mana’o i seleni ua maua”. O le taiala aupito sili lea ona talafeagai mo se tamaoiga mausali. E le mafai ona tatou faalagolago pea lava pea i le agalelei o a tatou paaga mai fafo. E tatau ona tatou taga’i toto’a i tupe maua o loo afua mai le lotoifale ma fesili...o a atina’e faamuamua e gafatia e seleni ua maua. E tatau foi ona fuafua tatau galuega e tatau ona ave i ai le faamuamua ina ia aua ne’i oia auaunaga mo le mamalu o le atunuu. O le taunuuga lea o le aveesea o Samoa ma atunuu tau atia’e.

Lau Afioga i le Fofoga Fetalai ma sui mamalu o le Maota

E fia faaleo le agaga o le faafetai ma le faamalō a le Malo i a tatou pa’aga o lo’o saofāgā mai i le atina’e o Samoa. Faafetai agalelei ma le lagolago mai i le atina’e o Samoa.

E fia faamauina fo’i le faafetai i le mamalu o le atunuu mo la outou lagolagosua aemaise o talosaga aua se manuia o si o tatou atunu’u. O la matou tatalo, ia i ai pea le agalelei ma faamanuiaga a le Atua i a Samoa a’o tatou aga atu i le faamanatuina o le 53 tausaga o le tuto’atasi o lo tatou Malo.

Lau Afioga i le Fofoga Fetalai,

I lo’u agaga faaaloalo tele, ou te tuuina atu ai le Tala Faatatau Autu o le Tupe, mo le tausaga 2015/2016 mo le lauliuina e le Palemene.

Soifua